



REPUBLIKA E SHQIPËRISË
ENTI RREGULLATOR I ENERGJISË
BORDI

VENDIM

Nr. 29, Datë 14.02.2022

MBI

**NDRYSHIMIN E PJESSHËM TË PËRKOHSHËM TË VENDIMIT TË BORDIT TË
ERE-S NR. 146, DATË 10.09.2020, “MBI LICENCIMIN E SHOQËRISË “SEKA
HYDROPOWER” SH.P.K., NË VEPRIMTARINË E PRODHIMIT TË ENERGJISË
ELEKTRIKE NGA HEC-ET “SEKË” ME KAPACITET TË INSTALUAR 12667 KW
DHE “ZAIS”, ME KAPACITET TË INSTALUAR 2295 KW, ME KAPACITET TOTAL
TË INSTALUAR 14962 KW”**

Në mbështetje të nenit 16, të ligjit nr. 43/2015, “Për sektorin e energjisë elektrike”, i ndryshuar; neneve 451 dhe 479, pika 1, gërma “a”, të Kodit të Procedurës Civile të Republikës së Shqipërisë, nenit 104, nenit 113 dhe nenit 67, të Kodit të Procedurave Administrative të Republikës së Shqipërisë dhe nenit 15, të Rregullores për organizimin, funksionimin dhe procedurat e ERE-s, miratuar me vendimin e bordit të Entit Rregullator të Energjisë (ERE) nr. 96, datë 03.09.2016; bordi i ERE-s në mbledhjen e tij të datës 14.02.2022, mbasi shqyrtoi relacionin e përgatitur nga Drejtoritë Teknike me nr. 236/2 prot., datë 09.02.2022, “Mbi shfuqizimin e pjeshëm të vendimit të bordit të ERE-s nr. 146, datë 10.09.2020 “Mbi licencimin e shoqërisë “SEKA HYDROPOWER” sh.p.k., në veprimtarinë e prodhimit të energjisë elektrike nga HEC-et “Sekë” me kapacitet të instaluar 12667 kW” dhe “Zais”, me kapacitet të instaluar 2295 kW, me kapacitet total të instaluar 14962 kW”,

Konstatoi se:

- Bordi i ERE-s, me vendimin nr. 146, datë 10.09.2020, vendosi të licencojë shoqërinë “SEKA HYDROPOWER” sh.p.k., në veprimtarinë e prodhimit të energjisë elektrike nga HEC-et: “Sekë” me kapacitet të instaluar 12667 kW dhe “Zais” me kapacitet të instaluar 2295 kW, me kapacitet total 14962 kW, për një afat 28 vjeçar.
- Vendimi nr. 146, datë 10.09.2020 i bordit të ERE është ankimuar nga paditësit B. P., dhe të tjerë pranë Gjykatës Administrative të Shkallës së Parë, Tiranë, e cila me Vendimin Nr. 49, datë 18.01.2021 ka vendosur ndër të tjera, pranimin e pjeshëm të kërkesë padisë së paraqitur nga paditësit dhe shfuqizimin e pjeshëm të aktit administrativ, vendimit nr. 146, datë 10.09.2020 të bordit të ERE.
- Kundër këtij vendimi, “SEKA HYDROPOWER” sh.p.k., ERE dhe Avokatura e Shtetit kanë paraqitur ankim pranë Gjykatës Administrative të Apelit.

- Gjykata Administrative e Apelit, me Vendimin Nr. 559 (86-2021-671), datë 10.11.2021 ka vendosur lënien në fuqi të Vendimit Nr. 49, datë 18.01.2021 të Gjykatës Administrative të Shkallës së Parë Tiranë.
- Kundër Vendimit të Gjykatës Administrative të Apelit, ERE, “SEKA Hydropower” sh.p.k., dhe Avokatura e Shtetit ka paraqitur Rekurs pranë Gjykatës së Lartë, Tiranë dhe kërkesën për pezullimin e ekzekutimit të vendimit të gjykatave, konkretisht Vendimit Nr. 49/2021 të Gjykatës Administrative të Shkallës së Parë, Tiranë dhe Vendimit Nr. 559/221 të Gjykatës Administrative të Apelit.
- Në nenin 451, gërma “a”, e Kodit të Procedurës Civile, parashikohet se: “vendimi që ka marrë formë të prerë është i detyrueshëm për palët”, ndërsa gërma “ç” parashikon se: “një vendim i gjykatës merr formë të prerë kur është lënë në fuqi, ndryshuar ose është pushuar gjykimi në shkallë të dytë”.
- Gjithashtu Kodi i Procedurave Administrative në nenin 113, pika 1, parashikon se: “një akt administrativ mund të anulohet apo shfuqizohet, kryesisht nga organi publik që ka kompetencë të nxjerrë aktin. Pika 2, vijuese e këtij neni, përcakton se shfuqizimi i aktit administrativ ka pasoja vetëm për të ardhmen dhe se shfuqizimi mund të jetë i pjesshëm apo i tërësishëm”, ndërsa pika 3 përcakton formën ligjore të shfuqizimit të aktit, përkatësisht përmes një akti të ri me shkrim, i cili anulon, shfuqizon, **ndryshon** apo plotëson aktin e parë.
- Me paraqitjen e Rekursit dhe kërkesës për pezullimin e ekzekutimit të Vendimit të Gjykatës Administrative të Apelit Nr. 559 (86-2021-671), datë 10.11.2021 para Gjykatës së Lartë, si dhe kërkesave për plotësimin e të metave datë 28.01.2022 dhe datë 31.01.2022 kjo e fundit për sa përcaktuar në nenin 479, pika 1, gërma “a”, të Kodit të Procedurës Civile të Republikës së Shqipërisë, mund të vendosë pezullimin e ekzekutimit të vendimit të Gjykatës Administrative të Apelit.
- Në çdo rrethanë, në rast të marrjes së një vendimi nga Gjykata e Lartë për pranimin e rekursit dhe /ose kërkesës së paraqitur nga palët për pezullimin e ekzekutimit të Vendimit të Gjykatës Administrative të Apelit, ERE rezervon të drejtën që në vijim të shprehet në përputhje dhe në zbatim të kësaj vendimmarrje.

Për gjithë sa më sipër, bordi i ERE-s,

Vendosi:

1. Ndryshimin e pjesshëm të përkohshëm të vendimit të bordit të ERE-s nr. 146, datë 10.09.2020 “Mbi licencimin e shoqërisë “SEKA HYDROPOWER” sh.p.k., në veprimtarinë e prodhimit të energjisë elektrike nga HEC-et “Sekë” me kapacitet të instaluar 12667 kW dhe “Zais”, me kapacitet të instaluar 2295 kW, me kapacitet total të instaluar 14962 kW”.
2. Pika 1 e vendimit të bordit të ERE-s nr. 146, datë 10.09.2020, ndryshon dhe bëhet:

Të licencojë shoqërinë “SEKA HYDROPOWER” sh.p.k., në veprimtarinë e prodhimit të energjisë elektrike nga HEC “Sekë” me kapacitet të instaluar 12667 kW, për një afat 28 vjeçar.

3. Pjesa tjetër e vendimit të bordit të ERE-s nr. 146, datë 10.09.2020 mbetet e pandryshuar. ERE ka të drejtë të rishikojë këtë vendim në varësi të vendimmarrjes nga Gjykata e Lartë për rekursin dhe/ose kërkesën e paraqitur nga palët për pezullimin e ekzekutimit të Vendimit të Gjykatës Administrative të Apelit.
4. Drejtoria e Licencimit, Autorizimeve dhe Mbikqyrjes, të njoftojë shoqërinë “SEKA HYDROPOWER” sh.p.k., MIE dhe palët e interesuar për vendimin e bordit të ERE-s.

Ky vendim hyn në fuqi pas botimit në Fletoren Zyrtare.

Ky vendim botohet në Fletoren Zyrtare.

KRYETARI

Petrit AHMETI